

COMUNICATO n. 2619 del 24/09/2025

Pittnândar pitt EUSALP, drai tang zo reda übar di profesiongen boda âgian in beldar un di arbat von holtz

“Discover Mountain Jobs”, khennen di arbatn von pèrng

[Cimbro] Von 18 sin atz 20 von herbestmånat sintza djunge hãm genump toal dar editziong 2025 vo “Discover Mountain Jobs – Balt un holtz” hergerichtet da in Trentino zbisnen in Sugåna tal un in Fiemme tal un augelekk von Khnopf Aktziong 3 vodar européan stratedji vor in alpinar raum, boda iz koordinart vodar autonome Provìntz vo Tria durch ’z Àmt vor di Zungmindarhaitn un di auzantn sachandarn. Dar Khnopf Aktziong 3 tratàrt tème boda âgian in merkà vodar arbat, edukatziong un formatziong un zbisnen allz daz ândar lekkar au sachandarn boda magatn gem arbat afte pèrng, pinn zil zo ziaga zuar talentn un zo halta di laüt zo leba in di alpinar teldar. In disan kontèkst lekkse di initziatìf “Discover Mountain Jobs” (khennen di arbatn vo pèrge), boda haür bart soìn übar di profesiongen gepuntet in èkosistèm von beldar un allz in sèll boda âgeat in holtz, augelekk pittar mittarbat vodar Task Force EUSALP “Foreste multifunzionali e uso sostenibile dei materiali legnosi”.

An fintzta atz 18 von herbestmånat di djungen toalnemmar zoin khent âgenump in da schümma kornìs vo Arte Sella, bosa hãm gekhennt di vortretar von forestàl Dianst. Dar Gian Antonio Battistel, von Nåsüach un Vornaügarung Zentrum vodar Stiftung Edmund Mach, hatt khött bia di européan prodjèkte nâzosüacha soìn bichte. Dar Valentino Gottardi (Dianst vor di Beldar vodar Provìntz) hatt gezoaget in bichtege ruòl boda hãm di provintziàl Forestél un allz daz sèll bosa tüan zo schütza di umbèlt un di laüt.

Dar tage darnâ, vrait 19 von herbestmånat, hatt âgeheft gianante z’sega di schual CFP ENAIP vo Tesero – sektór holtz möbl un sang ’z holtz, gevüart vodar profesören Giada Mearns. Dar trèff pitt profesör, studjént un ex-studjént, boda haüt sa arbatn in disan sektór, hatt gemacht auzkhemmen bia bichte ’z izta di mittarbat zbisnen alln in sèlln bosen âgeat zo riva auzolega an sistèm starch un pittnan groazan vèrt, an sistèm boda geat vo bia zo halta da kunt in balt sin afte mearare oportunitét zo maga vennen an arbat in sektór von holtz. Gianante z’sega di Sage vodar Magnifica Comunità di Fiemme un da sèll Enrico Ciresa S.r.l. di studjént hãm gemak seng sèlbart dise oportunitét. Übarhaup di djungen hãm gemak seng pittna bettana pegaistarung ’z arbateta dar untarnemmar Fabio Ognibeni in soinar firma boda macht armònesche vlekhan vor kubl strumentn un klavirn, un di bölle bodar hatt zo macha hèrta èppaz näügez haltante kunt von sèll bodar hatt gelirnt in sovl djar arbat. Dar khurtz trèff pinn Alessandro Arici vo Radio Fiemme hatt o sichar gètt guate informatziongen, dar hatt khött in djungen ke azma gloabet in sèll boma böllat tüan an tage odar in ândar gelânkmada zo machaz khemmen realtét.

An sântzta atz 20 von herbestmånat di toalnemmar soìn gânt z’sega in magazì VAIA, un asó hãmса gemak darvèrn bia von sèll schaüla birbl von djar 2018 saida auzkhent a startup boda pittar zait iz khent z’soina a djüsta firma boda hatt azpe khèrn vo soinar arbat da zirkolàr bichtschaft. Von sèll boda hatt getânt dar birbl Vaia in ünsarne lentar hatta o geredet dar Paolo Sandri, vorsitzar vodar Feroine Hântarbaratar von Trentino boda hatt kontàrt ke dar hatt gemocht bidar vången zo hântn soi firma un bèksln vil sachandarn zo maga arbatn allz ’z holtz boda dar birbl hatt gehatt nidargeprocht. Daz sèll bodar hatt khött hatt gemecht no a botta

bia bichte 'z iz lengse panāndar pitt realtét boda machan da gelaichege arbat saiz azza soin nāmp, saiz azza soin vort bait o.

Vo bia bichte 'z iz auhaltn di djungen un nemparnse zo macha zèrte arbatn afte pèrng un asó gem a zuarkhemmane disan lentar hāmda geredet di aministratör, boda hām āgenump di djungen atz Roncegno Terme, dar vitze pürgermaistar Mirko Montibeller un di asesören Giuliana Gilli un atz Tesero, dar pürgermaistar Massimiliano Deflorian.

Dar Discover Mountain Jobs 2025 – Balt un Holtz iz khent augelek drinn in Prodjèkt Support EUSALP, geschützt von interredjonāl Progråmm Alpinar Raum.

Zo bizzasan mearar aftn Khnopf Aktziong 3 vo EUSALP geat aftz [disan link](#).

Übarsetzt von Schaltarle vor di zung von Toalkamou vodar Zimbar Hoachebene

(cdt)